

四庫全書

集部

欽定四庫全書

集部

粵西文載卷六十五

詳校官庶吉士_臣瑚圖禮

主事銜_臣徐以坤覆勘

總校官庶吉士_臣朱 銓

校對官中書_臣王鍾泰

謄錄舉人_臣劉 禮

欽定四庫全書

粵西文載卷六十五

桂林府通判汪森編

傳

名宦

楊守隨字惟貞鄞縣人由進士任御史弘治初以忤權貴出知南寧府承檄勘忠州事暮夜餽金堅却之時吏治多不法守隨獨亢節自奮罷里甲供饋禁佐屬勿得

擅受訟訴督課諸生懲男女之不以禮婚者郡俗為之一變歷陞本省參政按察使終工部尚書謚廉簡

汪溥績溪人舉人弘治初擢知慶遠府政仁潔操愛民作士一出於誠鑿塹匝關引流注之建香山關敵臺及甃東城洗馬河口以杜賊庚申賊攻城果足恃為固溥以外艱歸士民交章請於上得再蒞郡旌倪扶攜迎於郭外如獲慈母尋陞廣西副使整飭石江兵備

姜瑄弋陽人由進士任監察御史忤權貴謫判沔陽州

弘治中歷陞慶遠知府剛果嚴明輕徭薄斂民安之庚申賊攻城瑄區畫禦備城賴以安尋陞副使整飭右江兵備風裁凜然以思恩府土酋岑濬潛謀不軌討平之遷河南按察使

劉璉字子玉鄱陽人由進士弘治間知柳州府柳在萬山中城外皆賊巢占掠民田焚其室廬質其妻子公屢征諸獍有功都御史陳金優薦之魚峰賊周鑑復相煽為亂璉率兵數百禦賊賊敗走璉追之賊偵援兵不繼

還戰獲璉剖腹實草焚其尸郡人哀之

余玉內江人舉人弘治間知平樂府七年草寇為患公增鑿後山為二塹築土垣立排柵為外衛於城下闢馬路令軍士周旋巡警賊聞風不敢近鄉民告急親督軍士集民兵設奇捕截累有功明年請兵平之民賴安堵謝湖字有客海陽人進士弘治間知平樂府初郡庠在城外東澗偪仄傾圯久弗治湖相地卜集不數月而告成課農事撫同猺境內寧謐六年課最陞本省參政

劉芳字永錫陽江人進士弘治十一年南寧知府愛民忤上久淹於職致仕去民懷之

何琬南海人舉進士弘治間知梧州府平易近民從寬應事辭色不厲民不忍欺

劉琰衡陽人舉人弘治間平樂府同知性爽閎軒豁披示肝膽在事六年吏守其程民安其業

丁襄莆田人舉人弘治間平樂府同知以文學知名造就士類多興起者尤達治體所釐汰舉行皆因俗而潤

飾之九年考績督府劉大夏薦其才擢廣南守

談一鳳字文瑞無錫人弘治壬子舉人乙丑任桂林訓導博洽有史才委纂孝廟實錄督學姚鏌深器重之時建宣成書院選八桂雋士延師分教以鳳總理其事嚴立教條析疑義正文體每勵諸生以明體適用之學綽有蘇湖遺風以外艱歸

徐珙海陽人弘治十五年

闕二字

府訓導剛方嚴正士類

信服學宮後有五顯祠珙毀之會二子相繼卒或以為

崇曰天命也鬼能禍福哉終不惑

羅爵吉水人舉人弘治八年知養利州凡州署廟壇橋梁諸興作自公始建又教民從學開闢文風

何璋順德人舉人弘治十年橫州知州簡素持已平易近民流民復業者數百

羅環字延賓新喻人弘治九年慶遠府推官清介威嚴獄訟多所平反十七年知上思州改土為流知州自此始優於治體銳意變夸其建議當道者一曰易風俗教

士子二曰蘇民困革土兵三曰通傳遞設舖舍四曰別土流革土吏陞池州府同知民有去思

潘常閩縣人舉人弘治初橫州學正以師道自重講解不懈壬子乙卯鄉闈弟子登科者獨盛陞永州通判

李瀚字宗惠邵陽人舉人任全州訓導性剛介善造就人材士嚴憚之

吳原正字復明通山人舉鄉書弘治初知博白縣一僕自隨時遭兵燹民皆離徙原正還定安集悉復舊業龍

山寇數千為亂討平之雖兵務劬勦而學校城池公署
橋梁靡不修飭督府檄查兩省詞訟博白獨無其廉明
果決訟牒簡絕如此尋擢思明同知太守張吉以縣方

擾攘請留任父老謂令長大有德於民推原正云
鄭普漳浦人弘治二年知興安縣剴直果斷作興學校
區昌順德人舉人弘治六年知懷集縣勤慎廉能利興
弊革廢墜畢舉為一時縣令之最

王文紹南海人弘治七年知興安縣廉謹公平不濫不

擾民有餽米者取其一撮而已

何綸鉛山人監生弘治間知平樂縣時喪亂之餘物力耗訕綸一意簡靜民以不擾

曾源海陽人弘治間知北流縣剴方正直果決有為凡學校城郭橋梁街衢類多捐俸修繕後以奸徒中傷免興論惜之

梁魚順德人弘治間知平樂縣先是猺蠻屢梗軍旅數興阡陌半為蒿萊而賦無少減魚奏蠲樂山津平二里

浮糧五百石間有不能輸者復權商稅助之時有花封
五嶺之謠

周岡合浦人弘治間知陸川縣政事嚴明戶口增益
郎珍臨安人弘治間知陸川縣廉介仁愛修學築城七
年去任民仰之

羅子芳順德人舉人弘治九年知永福縣潔已任職時
築城垣不就子芳下車即竭力經畫請當道發公帑設
法甃砌力省功倍不三載告成保障之功至今攸賴又

創察院及蘭麻公館帑藏不足皆捐俸為之

羅嵩通城人監生弘治間前後宣化北流二邑知縣邑治疲劇嵩蒞政臨民修廢舉隆綽有矩度民不敢譁咸德之

李謐鉛山人舉人弘治間知宜山縣政尚仁恕鼎建縣治凡奉藩府檄坐軍需必會計合邑丁糧通融灑派榜之縣門小民咸知其數里胥不得緣以為奸民懷之周曾安鄉人弘治間知灌陽縣以廉仁為政招撫逃亡

復業至數百家大田畝清軍伍無能售其欺者

葉喜雨饒平人監生弘治間知修仁縣縣故夸數自失
吉祥安平二里後孤城荒落不堪為邑雨怡然安之曰
置吏效官正於此地乃結以恩信馭以方略邊境稍寧
葉儀長泰人弘治中任恭城令時舊城遷黃牛岡草創
苟完未幾就圯儀重加繕葺尤以學校為重殿堂門廡
煥然一新提學副使周孟中為記稱美之

唐聰長沙人弘治元年陸川典史繁亂之際贊政恤民

民久而頌之

詹志文孝感人舉鄉書弘治間尉蒼梧不詭隨媚世語
曰與其糜祿屈人孰若適志自樂棄官去

彭金南海人弘治間尉陸川廉公慈愛乞休去民像慶
壽堂祀之

余煥字文光會同人舉人弘治十年永福教諭性狷介
纖芥不苟取動止恂恂不踰禮則日羣諸士於學宮繙
閱經史夜分不寐一時士人咸知淬礪

史智弘治間任北流教諭經明行修啓迪生徒士多賴以成就

王璉樂昌人舉人弘治間知富川縣性愷悌嘗言令以牧民為職即三尺法何所用之惟通達其情上下聯絡事固弗濟其催科絕不事鞭朴賦亦無逋者

麥祈慶字景祥順德人弘治十五年任興安教諭持已以正教人克勤從者雲集

麻琳直隸人弘治五年永福守備凡在任七載徭賦斂

戰時上邊山民戶鮮少建議招良犗耕種人甚愛之

楊觀字國賓合肥人弘治間歷官軍門坐營千戶時諸蠻猖獗觀効力行間勞績最著擢都指揮僉事勅授昭毅將軍因女為靖江王妃遂移家於桂弘治庚申卒孟御史洋為誌其墓子孫墳墓俱在桂林

馮琚字良珮順天人起家指揮以戰功累陞都指揮琚軀幹僅中人兩目炯炯方額豎鬚人望之知為虎將弘治間古田既陷諸砦峒蠻蜂起去郭一二里即劫殺靡

所顧忌琚領漢達軍不百人往來賊要害所部健兒黠
狡者委心撫之悉得其氣力故賊中情偽先知云古田
賊韋酋者約靈川七都賊聚黨千人待琚於險猝遇之
近瞋矣窘於弱佯疾走諸部伍所持戈矛悉委之狼籍
道途賊覘之鼓掌喜曰老馮怯也恣飲村落中琚固先
健兒偵伺天未曙諸酋方勦勦睡奮戟一呼響震山谷
披靡辟易自蹂踐死者無算畜犬二名之曰開山曰捕
山旌旄出則二犬導之遇有賊犬嚙琚衣號而顧蹤迹

莽蒼間果伏也於是諸谿峒謂老馮有神踞守永福賊聞老馮名卒不敢得志逾四十卒

熊繡字汝明寧遠人成化二年進士正德元年以兵部侍郎總督兩廣操勵廉潔自甘疏布餽廩羨餘不入私室禁番舶杜饋送風裁肅然

陳金字汝礪武昌人成化壬辰進士正德二年總督兩廣軍務時馬平獐大肆猖獗親統十三萬衆直抵賊巢平之陞左都御史遣官省諭古田賊其酋願悉歸侵疆

輸王賦如他州縣又省諭斷藤峽賊亦願通江路不阻
過往來朝議嘉之賜名永通峽己巳春陞南京戶部尚
書乙亥九月吏部會廷臣議以兩廣總督巡撫難其人
推公仍舊任加太子太保公以兩廣用兵全資鹽利而
鹽利之徵不取之於竈惟取之於商乃一一查復舊規
行之官商兩便公深以府江賊患為慮奏欲移平樂守
備官於昭平增撥民款弓兵哨守巡邏而於沿江之地
凡山勢險峻賊難踰越處所則無事隄防其餘但有徑

路可通賊行者或堆砌亂石以填塞之或斫取大木以阻遏之至稍平去處則開掘深阱斷其往來仍調柳州慶遠田州三府壯勇土兵三四千名分耕沿江拋荒田土官司各以牛具種子給之仍給以行糧暫於梧州府庫貯官銀或倉糧查給待荒田成熟罷給五七年後量輸租稅仍於其中擇其素有謀勇衆所推服者立為總小甲以管束之又數年後事體既定或設長官司或設巡檢司令其分番往來哨守巡邏而民歛弓兵始一切

不用兵部議上詔令鎮巡官一一如所議施行

楊旦字晉叔建安人弘治庚戌進士正德十三年以右都總督兩廣田州土知府岑猛者思恩土知府岑濬族黨也弘治年間濬亂猛降級因功陞指揮同知覲復其官會龍州知府趙源亡嗣襲以姪相猛因黨其妹所立假子韋璋者賂京還驛使詐傳詔旨起兵遂與璋襲破龍州逐知州趙相乃賂遺本兵及當國者猛圖以功贖罪復原職璋圖冒趙宗奪龍州請託於旦執不可當國

者廣人也子弟素與叛人通而本兵擅作威福巡撫歲有厚餽旦獨無二人交怒又嗾巡按廣西御史曹珪誣劾旦素清謹吏部為之駁白誣竟不行

張嶺字時峻蕭山人成化丁未進士正德十六年以右都總督兩廣初上思州隸思明府弘治庚戌土官黃智永故孫鑿襲為其族黃理所殺族絕改立流官隸南寧府正德丁未思明知府黃暘謀復州詐以鏐為智永孫宜襲州目訐其詐暘意沮乃嗾鏐糾遷隆峒兵劫鄰境

攻州弗克總督林廷選遣兵捕鏐繫潯獄有偽為公牘
下潯釋之鏐復與其黨殺掠州境至是嶺督官軍勦之
鏐走匿生漆山獲之檻送三府并俘其妻子鏐死於獄
仍棄市嘉靖二年嶺西賊蔡猛三聚新寧恩平縣白水
白玉萌等賊衆至數萬人僭稱名號剽掠鄉村至燒蓮
塘驛舍為害年久嶺調集漢達土官兵討之俘斬一萬
四千名顥後歷南京工部尚書

王啟字景昭黃崗人登進士正德四年以江西按察副

使觸怒劉瑾降廣西容縣知縣謝文肅公贈以詩有不
挫心藏國士風之句瑾又行令廣西巡按御史提問罰
米三百石輸之官已復有事罰米二百石待命未報會
赦免久客梧州著邇言等書比瑾敗乃復為四川蓬州
知州後正德十六年任廣西左布政使嘉靖登極公與
右參政黃衷奏言廣西稅糧初四十二萬有奇頃以人
民逃散及土官不服輸納歲實徵共二十三萬有奇而
宗藩及官軍祿糧且過三十五萬將何以支上命發布

政司鹽銀五萬兩濟之初中官鎮廣西者歲以零陵香進費至二千金上即位詔却諸獻而廣西徵香貢如故至是公復請罷之

宗璽字朝用建平人正德間為廣西按察使練習文法吏不容姦訟獄至前裁數語而決暇則艤舟游眺所操不過食器筆硯獨坐諷詠見者不知其為監司也

方良永字壽卿蒲田人性至孝正德間為河南僉事以不肯謁劉瑾勒致仕瑾誅復起八年擢廣西按察使風

采峻整不嚴而肅陞浙江布政

楊茂元字志仁鄞人成化十一年進士弘治十八年累陞廣西布政司右參政思恩田州二府土官岑峻岑猛相讐殺害貽患地方正德元年上命三府進兵乃率前哨擒岑峻并黨屬一千有奇詔改二府為流官降岑猛為福建平海衛千戶猛遂擁兵據治勢甚猖獗乃臨其境諭以禍福猛言不便遠遷故耳茂元曰是不難即今魚窩等寨苗賊背叛汝能備兵從討以功贖罪吾將奏

請為爾免遷猛即叩頭願從魚窩等寨者柳慶猺獐也
其酋韋朝宣等亂三府具聞勅令征勦乃協同將官勦
破魚窩等寨擒斬甚夥事定奏免其遷況村黃文昌兄
弟三人久為思明府患二年陳都憲乃委同總兵官相
機撫勦文昌聞之面縛乞降乃徙文昌而平其黨

高友璣字肅政樂清人弘治庚戌進士正德元年累官
廣西右參政管田州府事土官岑猛者坐與族類構爭
削秩詔以漢官撫之前官懼而逸友璣單車入田境審

夸情向背待以懇誠宣朝廷德威示之順逆利害始猛
入見猶擁兵自衛久之乃遂款效束身聽命乃立學訓
士置堡伍聯其衆歸被擄男女以數百計田人帖服竟
不煩兵三年事聞朝廷宥猛且復其官

鄭岳莆田人進士正德三年以副使兵備府江時諸猺
乍叛乍服情態叵測岳謂治外當自內始於是視平樂
城樓櫓圯壞者亟葺而完之次及旁邑府江廣運足灘
二堡亭障畢具隱隱一金湯云

張九達號天衢大庾人弘治己未進士正德乙亥以參議分守廣西右江丙子征府江總督陳公以兵三萬檄公將之屯於府江之深塹據賊要害凡督戰數十皆克捷俘斬無算未幾班師卒

張祐鉛山人舉人正德十年府江兵備副使每以輜車巡下邑戢寇安民會荔浦寇起親率兵督戰俘馘以數百計乃修恭城縣城建富川守禦所築鍾山鎮城葺廣運足灘二城飭備固圉邊邑賴之

張芝字廷毓歙縣人進士正德間廣西提學其取士先道德而後詞章一時學者仰之如山斗云卒於官

張鳳袁州人由進士以廣西左參政掌思恩府事正德改元蒞任適當兵燹之餘百姓流移罔有寧宇舊目恣橫衆無所恃公招輯流亡修舉廢墜鋤強扶弱治地分田選智勇以充頭目給官田以贍生徒一切因革咸得其宜六年陞南京太僕寺卿民思之附祀王公祠

李雍晉江人進士正德四年由文選司員外出為南寧

知府安靜不擾民甚愛之在任二年陞廣東參政

官景安仁人進士正德間平樂知府為政屏絕一切苛
細務與民休息徭夸有弗率化者繫其首廷誨之以法
明示羈縻而已後亦鮮為梗者六年擢兩浙參政

汪獻字惟賢錢塘人進士正德六年南寧知府剛明正
直廉潔有為入朝卒於途民甚思之

胡世寧字永清仁和人正德間知太平府郡屬土官相
習戾驚不庭謁太守而守亦防猜情意益隔公至以檄

約如期至傳令其下皆甲而入越翼日出臨其營觀蠻
長騎射與款語良久乃還舊以土官世及輒展轉索賂
公令土官生子即聞府子弟應世及者年十歲朔望或
有事調集偕攜之見太守為識年數狀貌父兄有故按
籍為請官於朝土官大悅服茗盈州李萬盈與全茗州
許榮高仇殺二十餘年羅陽縣黃景明爭官占地二十
餘年至公始平太平州李璿拒命公密檄龍英州趙元
瑤討之生得璿郡勢面腋阻江而背獨無限公檄營城

北為壺關增戍其上民始帖席後官至本兵卒謚端敏
葉性字叔理臺江人舉人正德間慶遠知府地瀕猺獞
至為難服公馭以恩信咸得其懽心城外羣蠻寇掠不
時乃建堡為衛民安堵焉思其功者像而祀之

李守經汝陽人舉人正德間平樂知府以愛民厚士稱
民有爭至府者善諭遣之訟庭常空每與諸生談論經
義津津不置口時論韙之

江琮正德中知潯州府明習吏事務存大體弗受請謁

廉介始終不變卒於官人哀思之

周任字以仁江山人弘治進士正德間累官梧州知府
比至適大舉用兵資餉百務皆取給於梧任酬應裕如
百度咸舉中閤武勛並蒞張甚任正處之弗諂傲潛翦
其羽翼置於法乃畏憚弗敢肆卒於官

江鑣字朝儀奉化人正德十六年知桂林府愛民如子
馭吏以嚴清操剛介稱為良守

曹琚字仲玉桂楊人弘治丙辰進士正德辛巳知廣西

梧州府時林廷選為總督妖賊李通寶竊發林檄琚
巡諸邑會北流已陷殺鬱林署印官擒巡捕通判以去
林因屬琚督軍追捕聞賊在陸川冒險追之迄夜營
平樂比曉視之則萬山中也進與賊遇戰於新橋斬十
餘級賊入於莽追斬之又十餘級遂歸於秋風根蓋其
巢也謀知其必遁入黃山又知賊皆衣青即抽兵使衣
白伏入黃山以待夜半賊果至伏發追斬五十餘級琚
駐鬱林林全諸梟將大軍為援通寶來攻狼兵又敗

之追斬百餘級於是其黨咎通寶曰爾謂能役神兵以
護我今安在邪皆欲散通寶懼而逃憩荒園中遊騎圍
之不知其通寶也有被鹵機兵在旁大呼通寶在此遂
斬之以歸餘黨悉平乃出令招民之脅從者因給牛俾
耕選其子弟入學時城郭悉經燹瓦礫滿目珇隨即
改建公署學宮堞樓之屬未幾皆完美而民不知費尋
建議復鬱林守備之舊林從其請甲戌春巡按御史朱
志榮與陳憲副陽文惡蓋朱索賄之故藩臬皆已偏索

咸勸琚稍副其求不爾嬰怒且被辱琚不得已應之陽因奏及琚四月朝廷命官校逮志榮去法司文致謂應之亦罪也上其事有旨皆降調琚即買舟歸桂陽郡致所積柴薪皆盡卻之歸之一月而有織金文綺表裏之賚蓋賞琚之功也於是家居無復仕進意阮時懋閩縣人正德五年慶遠府通判勤事愛民推心部卒築四閘及各鄉村土垣數千丈堅厚高峻保障有功後卒於官人思慕之

林巒正德間知鬱林州性剛介公平勸植善良鋤抑強梗歷任未暮人民悅服

顧璘字華玉上元人進士初守開封忤逆璫廖鏜正德九年謫知全州以興賢養才為首務重建柳侯祠增置亭宇與士子游息躬校其文士日以興歲旱嘗徒跣詣禱覆釜山雨隨之歷官南京兵部尚書

章詒太湖人舉人正德間知全州六年和易不擾民舉安業轉廉州丞山谷小民持雞米追送者塞於途

黃琮字元質上元人進士正德九年橫州知州絕承奉
省浮費民無征科之擾然性頗傲不屑邊幅創淮海書
院與諸生講解善吟咏有嶺南日課陞岷府長史

鄒紉臨川人正德間永安知州時邊境騷動日尋干戈
徭寇直趣州城紉誓衆固守竟保障一方

黎磐正德十二年知上思州修理城治鼎建學校優於
才能當路薦之調橫州知州以親老致仕去

季鑾舉人正德間任鬱林學正學規嚴肅教人有方士

子悉荷陶鎔稱頌不已

周倫字世明侯官人舉人任全州學正捐俸周貧端範率物仕終監察御史今學有去思碑

鄭寶福建人正德間丞鬱林州署北流縣事適妖賊李通寶倡亂寶與子宗珪率兵出禦殺賊二十餘人賊稍却乘勝逐之父子皆死事聞贈本州知州

羅鏞建寧人監生正德三年武緣知縣愛民好士制行端慤衆論取之

楊尚文貴陽人進士正德初陽朔知縣徭頑弗即工者累年尚文諭以威德皆相率來受約束供賦稅流移聞之歸復業者以千數

張恬句容人正德初以蔭授永福知縣行所無事以廉愛稱甫一期卒於官百姓奔走悲號無問遠邇

劉敵泰和人以鄉舉正德七年知永福縣憫民憔悴力求安利之罷府倉之運免虛耗之徵停冗費省清戎民困以蘇徭獍出沒不時嚴立保伍撫諭諄切卒不敢為

亂後擢賓州守

林珍順德人舉人正德八年宣化知縣諳練土俗諸所斷決裁以法理民皆懾服無冤焉

李浩徽州人舉人正德十年知永福縣留心教養體恤百姓如保赤然民夸輯睦有古循吏風

陳猷潮陽人舉人正德間知恭城縣時源徭不靖每患嘯聚猷繕甲兵練土著為保障計又修學校葺縣治未幾卒於官士民哀之

石希介成都人正德十四年知岑溪縣勞心撫字嘗築外城以奠居民謂岑土瘠民貧皆由不通舟楫募石工欲鑿瀧底石山以通河道因調繁改任蒼梧未果鑿百姓思之崇祀名宦

梁順甫字天祐泰和人正德十五年知義寧縣學識優長振作士類創楊梅堡建養濟院修文廟塑聖像置祭器修縣治時以賠征軍舊糧為苦懇請免之邑人費頤稱其為文章政事之全才云

雷燮甌寧人正德間知荔浦縣時猺獞羣起民無寧居所在累石結砦依險自固并世業棄之燮下令招撫復業者免其賦貧無牛種者官給之流移漸復

蒙宗遠番禺人正德六年任靈川典史縣故多猺獞募驍民防守名曰打手皆部官統之宗遠至戒毋餽常獻毋偷苟安約會練習人人思奮時有賊號沖天將犯城率兵逐至周家灘斬之自是諸酋屏跡城堞久圯捐俸募役或時抱石為部民倡不旬月告成至今賴焉

吳深字子靜蒼梧人正德庚午舉人授永福教諭好問學鎮日坐齋以身為範誨人懇懇寒暑不廢有以束脩見者輒汗顏固謝

甘永泰瓊州人舉人正德六年任靈川教諭持已端肅日考課不少輟諸士中年幼者口授句讀如黨塾蒙師然董戒甚嚴及門之士貴顯者數倍於前士類仰之彭鍾長沙人正德十五年武緣教諭易直子諒模範尊嚴課士惟勤嘗修武緣邑志

楊汝蕙字吉夫莆田人正德十六年永福教諭前此永
庠苦於孤陋公以師道自任與門人講論理學行事嚴
肅愛人不以姑息一時士類皆所造就卒於官諸生皆
執心喪扶柩出境所著有詩經精義

羅喬保昌人正德間陸川司訓心行峻潔教誨勤嚴人
才出其親授業者甚衆弟子員貧苦者遇有疾病捐俸
助之又能以厚道勸引風俗多易署縣署博白學獲兩
邑士民之心口碑頌之

呂璧四川遂寧人正德間以明經授陽朔司訓日與弟子講學其俸資束修毫不私受俱給與貧生婚喪無力者悉助之履任三年致仕

歐陽昉江華人正德十二年武緣訓導博學強記訓迪辛勤操守有恒課業不二其心署永淳學篆而卒

馬良字德卿潯州衛指揮使值猺寇猖獗每報警即領兵追捕常乘白馬能左右射屢敗賊賊不敢向或望見白馬輒遁去適御史巡方至大湟江遇賊逼官舫良奮

力登舟以身翼御史手刃四人賊始退守平南賊將攻城良策馬直衝斬一首大呼衆兵繼進追至古掃斬獲無算賊由是不敢再犯陞廣西都指揮僉書

周龍字子雲潯州衛指揮同知正德末哨守平南賊臨境鄉村遭劫勢甚熾龍領兵出禦同事者懼欲引退龍曰任汝自愛吾儕世祿將安用之今日正所以報朝廷也乃身先衝敵連刃三賊而後兵莫繼力不能支遂死於陣賊因散去城郭無虞邑人感而祀焉

盛應期字斯徵吳縣人弘治癸丑進士嘉靖四年總督兩廣先是思恩府土官岑濬誅改設流官嘉靖壬午劉召謀復濬姪謙土官都指揮孫震覺之下謙獄謙死頭目劉召復欲立濬庶弟漢之子權乃據南海堡五里之地有衆五千餘人又占武顥等三里殺李煉及生員韋光都御史張嶺檄兵備副使鄧炳參將李璋等率兵勦之時調土官岑猛兵猛子邦彥後期致兵敗震被執炳璋等於是佯許權復土目召乃送震歸璋等尋以兵入

思恩破感骨寨召遁岳梅寨適嶺被召還應期代之督
攻益急賊危蹙璋謀誘守者為內應以三月晦克之焚
其巢召墜火死函首詣軍門

姚鏌字英之慈谿人弘治癸丑進士正德間任廣西督
學僉事時桂城有二妖曰山魃與卓望者為幻一日縱
火焚生員徐佐室傍小廬又擲瓦石擊其臥榻碎之鏌
命佐具詞乃為文告城隍遣邏者於各祠廟索二妖像
鎖至城隍廟除之乃索諸廟不正繪像命官悉焚焉時

一女子託神為姦亦執而治之聽民娶以為妻自是妖風遂息嘗建宣城書院擇士之後秀者聘經師分教之得人之盛前此罕儼累陞右都御史嘉靖四年命提督兩廣軍務時田州土酋恃其兵力凌轢諸峒前督臣盛應期已奏調諸州及湖廣永順土兵克期進討鎮至蒼梧倉卒調兵集糧正月岑猛揚兵大灘二月造舟果化三月潛師窺武緣偵我有備乃止鎮開諭猛使束身歸罪當請於朝待以不死猛終不聽撫世廟以岑猛搆亂復

問勦撫之宜即上疏言猛不誅則土官未有懲猛所最忌者惟湖廣永順保靖土兵而已土兵一到彼當瓦解會永保兵至分兵五哨蹙之破定羅下丹梁猛子邦彥與其驍將韋好陸綬列十二營於工堯分道挑戰官軍奮而前斬綬好邦彥被箭遁去其衆始大潰猛陣亦潰猛奔歸順歸順土官岑璋者猛之岳父也鳩猛傳首南寧而其子邦彥亦病死捷奏上嘉其功進左都御史加太子少保降勅獎勵獨土目盧蘇未獲而王受梁啻者

則劉召之遺黨也盧蘇招受等同叛蘇遂入田州執署
印知州王熊兆而受襲據思恩鎮復奏請軍勦之廣西
布政嚴紘失謁鎮責其使紘銜之嗾巡按石金劾其失
策以致再亂且言岑猛父子尚在交趾助之將破兩廣
郡縣以逞其忿時桂萼張璉每於館閣出金紘揭帖於
袖以示諸講官謂兩廣難保大學士楊一清折之曰任
事難議事易宜徐察之二公不聽廣東提學魏校以毀
淫祠為名毀諸名刹其田數千畝盡入方西樵霍渭崖

諸家鎮至廣命追奪還官方霍恨甚至是遂與張桂合議排之六年六月以災異例請致仕上輒允之鎮閒住後起總督三邊

王守仁字伯安餘姚人嘉靖丙戌官兵攻田州岑猛自殺土目盧蘇脅思恩王受復亂六年起守仁於家節制湖廣江西兩廣諸軍事宣上威德待以不死諸蠻悉降思田平又分兵勦八寨斷藤峽條陳處置思田八寨五屯事宜多見施行

林富字省吾城東人弘治壬戌進士世宗登極歷廣西
布政兩廣都御史姚鎮委以思田兵事蓋岑猛麾下盧
蘇輩結思恩遺孽王受仍為亂也王受在思恩執知府
以下官屬羈他所以衆出掠至膺墟將進逼武緣富部
分諸將且覘知受空城而出密遣將徑趨思恩先發銳
卒百人潛入為內應受至武緣萬弩俱發退遁則我師
先克其穴賊勢既挫乃議撫處會姚解去代者王守仁
復委重于富論事頗合遂下命撤兵蘇受降富久居邕

管稔知八寨猺賊與思田勢相倚請于總督宜以時定
既剋日出師而富陞四川左布政連陞都察院右副都
御史撫治鄖陽報至富毅然終其事冒暑雨提兵入險
擒斬無算奏凱乃啓行至鄖陽守仁卒嘉靖八年陞富
兵部右侍郎無右僉都代提督巡撫之任初守仁上思
田八寨事宜下撫臣詳議富條其便不便甚確皆報可
毛伯溫字汝厲吉水人正德戊辰進士嘉靖戊戌征安
南陞兵部尚書兼右都御史參贊軍務庚子夏至廣徧

求計畫安南者始安南黎利代陳而王四傳至暕為陳
暕等所殺暕無嗣國內爭亂其臣莫登庸父子割據其
地黎氏舊臣鄭惟瞭等告變朝廷遣官廉之未得至是
勅公得以便宜行事公下令籍諸省土漢狼達水兵二
十餘萬兩廣雲南分三道進兵九月至南寧擇地布營
登庸懼屢使請罪且言黎氏已絕無可推擇願歸欽州
四峒故地世世奉朝貢正朔如制辭極悲懇公遂以十
一月納降鎮南關至期築壇具儀登庸率屬繫頸徒跣

北面蒲伏獻降表侯命遣姪莫文明代詣闕下公爲疏
請上從之以登庸爲安南都統使分治其地處惟瞭等
內地厚予田宅訪黎氏之裔館之他州進公太子太保
加賜銀綺詔班師

蔡經字半洲侯官人嘉靖十七年總督兩廣時芻灘賊
侯公丁等時出殺掠經會安遠侯柳珣發兵討賊以兵
事屬副使翁萬達誘致公丁斬之諸徭歸順藤峽復平
張岳字維喬惠安人正德進士嘉靖間任廣西提學與

諸生論學一宗程朱後總制兩粵約諸大吏非檄召毋
得入轅門即檄召不得持一物諸大吏惴惴惟謹故事
餉金俱上制府受記公歸之梧郡第視其牘稍鈎稽之
耳乙巳春封川徭民煽亂公集諸道兵討平之柳州徭
弗靖公徵兵三道並進破其巢馬平諸邑皆為編戶時
方議征府江諸徭而留都少司寇之命已下天子從御
史徐公言留公再督兩粵會賀縣告急公發兵平之遂
擢右都御史入掌院事

應擯遂昌人嘉靖三十年以兵部侍郎總督兩廣粵兩
司舊見制府行廷謁禮公以為非禮立更之時桂平諸
猺恣為剽斂而莊頭鬼子等巢諸賊為甚公密委副使
茅坤以討賊事不旬日破十有五巢府江少戢公復搜
故事為總督軍門志前列輿圖後覈兵防自討罪奏議
以至賞罰規制交南紀略稱信史云

吳桂芳字子實新建人嘉靖間分守嶺西作養人材擇
士館穀於崧臺書院躬課之四十二年總督兩廣修學

宮建尊經閣暇日進諸生講學時古田賊方熾遣守脩
卜禎典史廖元持文告諭之諸僮聽撫奏設鎮守廣西
總兵官以都督同知俞大猷充之後古田因得成功

陳道基字以中同安人嘉靖間巡按廣西下車按吏之
無良者墨吏舉望風解綬去巡行郡邑詢民勞苦銳為
興革會城西南河流舊故橫溢公為築橫橋而東之與
瀕江會公私交賴

錢堞字君望通州人嘉靖間巡按廣西諸所收治必親

得其太甚狀不旁寄耳目間屏騎從或之倉庫或徑入獄閱其弊孔即日披抉無一不快人意是時靖江侍衛軍校某某熒惑王聽喋遣捕斃之獄國人賴以帖然

鎮遠侯顧成字景韶子統統子興祖字世延嗣侯初為普定衛指揮永樂己亥廣西慶遠峒賊韋錢望等偽稱王侯元帥殺巡按御史諸璞奪其印命興祖率湖廣廣西貴州兵討之湖廣兵戍兩廣自此始也以指揮葛霆先披山通道榜諭脇從自歸兵既集以指揮魯義等為

左哨由賓州八寨諸路進以指揮李宣史雄為右哨由
思恩縣諸路進以指揮駱榮為後勁而自率中軍趨柳
州由小安定進斬其偽通天侯韋萬賢無敵大將軍韋
公嚮等分擊思恩五十二峒賊斬其偽通天都元帥覃
萬兩偽猛烈將軍韋公笑等四千三百四十人獲獐人
六百八十四人得御史印歸我男女萬人已平平樂南
寧二府樊家等村賊首蘇公夏等八千人俘偽韋王韋
萬黃等五百九十人融縣蠻梁羅八自稱梁羅王梁保

十自稱梁得天移兵討之皆繫頸乞寬獻俘行在所上
釋之又造橋渡烏泥江斬賊覃公隱等六百八十人仁
宗即位命進士任祖壽勅勞之佩以征蠻將軍印鎮守
臣佩將軍印自此始也已誅忻城縣賊覃宣等六百四
十人降義寧徭獠九百餘人武緣融縣賊廖孟進等偽
稱治平王陳宋將軍兵至東泉斬其偽都督韋圓等三
百三十九人俘廖孟進送京師以思恩州居民僅八百
戶割武緣白山峒七百戶隸思恩從之宣宗初廣西諸

賊復叛出梧州界捶阮天門蒼冒三嶺而冒突露橈浴
江攻東寨廖家樓盤八大山諸賊斬周時泰等一千九
百人自天門入平南縣大軍駐大藤峽江口殲祿廟諸
山賊駕舟入峽抵潯州水陸夾攻武宣縣諸賊獲其魁
韋保蓬傾巢舉落無噍類矣而故都指揮葛森妻許氏
告興祖十五罪上命自列興祖首實上語都御史劉觀
等宥之又以興祖言增置桂平平南十縣土官副巡檢
各一員凡十五人舉土人陸扶神等至皆用之流官巡

檢相尋死瘡瘍土人習貫庶無曠官也蠻軍公旺寇思
恩縣軍公新冠河池縣偽稱都督屬指揮彭舉等為前
鋒而提兵繼入三十六洞斬大酋韋天黨等一千七十
五人執拘公新送京師誅之已討宜山賊韋穩等夜銜
枚行天雨賊熟寢寤而驚失措斬七百人地遂平於普
義里思攬村封屍為兩京觀諸峒長韋敬曉等率眾附
上謂兵部尚書張本人情貪生畏死蠻夷同之卿語興
祖體朕意字育諸璧首左言之眾毋致失所興祖休兵

戢鈔暴嚴斥候設支閘即水南立墟奪得交易月以六
日名之曰豐樂墟南丹衛甫有城而平南蠻殺通判張
文郁江州土官黃志斌為叔所殺奪印去崇善土官知
縣趙暹僭王執故左州土官奪印殺其母皆討平之勅
以五千人從成山侯王通征交趾通比失利而交趾禮
縣賊楊伯春合黎利賊偽威遠將軍入犯興祖以都指
揮孫聚兵協討遇于思攬村斬三百三十人交趾偽金
吾將軍三萬餘人攻隘留關分軍四道攻之獲偽威遠

將軍斬三百五十人黎賊圍邱溫聚為敵樓飛砲神銃禦之賊不敢嚮邇橫州及貴縣賊入欽州殺靈山知縣至馴象衛境興祖捕得渠魁又勦柳慶府賊韋萬黃韋朝傳等黎利陷隘留關興祖屯南寧不及赴御史奏興祖宿留逮下錦衣衛獄尋釋之興祖四世孫寰字君錫嗣侯嘉靖十六年鎮守兩廣與督臣應檟議兩廣用兵有三曰大征曰勦曰截殺截殺最難而得功最真勦勦次之大征濫矣然必請命興師凱旋奏捷有升級之

例鵬勦截殺事出不測不請命不奏捷不錄功斬一人
財賞一金俘一人財賞二金至摧鋒陷陣奪門斬關運
謀用間功悉不錄請如嘉靖初部議增賞許陞無輒調
土官示弱長驕上從之所選衛所兵萬人悉勒習戰桂
林平樂徭殺知縣張士毅傷百戶曹恩竄討之俘斬四
百八十人已討七山賊七山居蒼梧岑藤三縣中阻山
二百里弘治以來四征不克竄治兵以征西為名至潯
州還潛入賊界賊棄巢遁戒無仰攻覆諸山下夫屯晝

夜決辰賊饑盡蒲伏降

沈希儀字良佐臨淮人正德初襲奉議衛指揮使嘉靖間思田參將調柳慶在柳慶十餘年殲淶里諸谿峒凡五十餘所獲諸大姓渠帥凡數千人身為大將左右兩江徭賊作亂歲無寧日希儀每戰輒先登散家財為賞得狼卒死力又善用諜動輒成功歷陞總兵時號名將西土謠云軍中有一沈軍士聞之心凜凜

章拯字以道蘭溪人弘治壬戌進士正德丁卯刑部主

事逆瑾盜政拯決囚不覆於瑾誣以復命遲慢下錦衣
獄數月調梧州別駕時夸獠數百人叫噪於馬平單騎
往諭之開以大義獠遂解散嘉靖二年累陞廣西左布
政使檢舊例務省約裕民朝廷為戚里陳萬年建甲第
會派省藩羨餘一萬兩拯以廣西地瘠民貧素無積財
惟軍門有犒賞餘銀乞將協濟以甦民困巡撫張公嶺
從之不煩括索而上下恬然時論韙之

萬潮字汝信進賢人嘉靖間為廣西左布政整肅有度

諸郡縣遣輸金至令各操金以次當前執法馬自較報
曰已如數乃目司庫覆視亡異即給批遣之去吏白批
過期久請治潮曰此中山徑水道恒苦諸蠻朝嵐暮靄
是生瘴癘安知來者不以此中沮乎但所輸不虧足矣
潮禁司庫官吏勿得輒離庫時遣視違必撻治之吏卒
惰慢一裁以法遭喪去右使夏邦謨代行藩事悉循潮
法或曰盍少寬邦謨曰財幣之府何可不慎吾見萬公
寬非嚴也竟遵之卒與萬公齊名

魏一恭字道莊莆田人嘉靖己丑進士督廣西學政額其扁二曰黜浮薄抑奔競揭之門首遇諸生年少列高筭必戒之曰毋志小氣輕也隨侍一僕冬夏惟一絹袍不加絲終其任未嘗一娛色情容歷轉廣西左布政具知民積苦向時科出顧役金錢者汰其半如均徭榜數不則收治之州郡奉令謹察諸吏無敢倍取後有同官陰詆於御史謂公營私亡何公卒御史弔畢突入所居檢視裝篋一無所有問其家童對以俸錢並在庫隨呼

主藏官吏至具對如前御史嗟歎大慟乃書具治行檄郡為主奉祀名宦

孫懋慈谿人舉進士知浦城有清政召拜南吏科給事中時朱彬擅權公特疏詆之尋出分憲廣東為彬黨所構逮詔獄謫尉藤縣至則創南麓書院與士子陳析經義不倦復議寬徵省役之法風行梧桂間及賜環士構祠於堂後相與尸而祝之嘉靖十二年任廣西右布政使當連歲師旅之後帑藏匱竭民力凋敝會計出納悉

心臂褻刻宿蠹汰冗費不遺餘力而涵容之度敦大之體論者服其雅量

楊本仁字次山杞縣人嘉靖間廣西按察使遷右布政與學使謝少南諷詠相高或月夜叩門露臺對飲或聯舟共游縱目江山率以為常公視事寬簡人自不敢犯訟者亦喜就公斷其曲直云所著有少室夢言

鍾卿字懋敬東莞人嘉靖己丑進士丙辰長廣西憲轉右轄坦夸真率不設城府人咸親之

胡堯元蒲圻人正德辛未進士嘉靖壬午廣西右參政
洛容邑為賊陷幾廢公復之建桂林書院買田百畝給
筆札膏燭選學官明經者為師諸生各以其經受業焉
土酋岑猛守田州以兵力凌轢他郡劉召者猛逆黨也
誘執都指揮孫震曰必復土目退官兵乃還震耳中丞
盛應期屬公進兵擒賊將李隆禮陸利廣脫其縛結以
恩信使執召轅門贖罪當道欲致二人于法公曰業已
許之其可背乎自是餘賊多附蓋自召叛至今十有九

年矣公乃深入東蘭那地金城諸絕域經畫疆理宣布
朝廷威德奏凱還是年冬中丞姚鏌疏請征猛天子可
之南京湖兵至檄公監軍都督指揮沈希儀等五將軍
帥八萬分道進猛懼謀不知所出裂帛書冤狀抵鏌鏌
不聽公帥兵進攻賊將陸綬號萬人敵猛男邦彥素驍
勇公選精騎馳射之綬五易其馬公追之殺七十四騎
而後授首邦彥逃猛出奔歸順知州岑璋猛之婦翁也
以其女失愛於猛憾之酖猛斬其首并佩印遣使上軍

門初時邦彥已授首公恐非真進隴容巢窮驗之冒瘴
死復蘇猶口授諸將兵事一十三條疾遂篤輿至橫州
卒時嘉靖五年九月二十九日知州陳堯恩視其行李
惟夏衣數襲圖書盈篋發公內帑殮焉士民哀之如喪
考妣請祠大中丞石金疏其死國事贈中奉大夫右布
政使祠桂林

蔣山卿字子雲儀真人進士嘉靖五年為潯州守會征
思田南寧為襟喉官兵四集饋饌丞劇制臣薦卿才調

南寧張約束調轉輸居民安堵軍餉克濟及事定制臣
議設思田為流府欲割思龍以附之卿力沮之曰此割
肉補瘡也卒如所沮改思龍為隆安縣興學重農惇俗
慎守咸有成績陞本省參政

鍾芳字仲實瓊山人正德戊辰進士嘉靖間任廣西右
參政去貴縣虎患諭降洛容賊討田州定平樂勦藤峽
屢有軍功捷聞兩賜金幣官至戶部右侍郎

曾存仁吉水人嘉靖間參粵西政富川荔浦諸邑斗絕

萬山中與諸僚錯壤使者行縣數十年不敢入其境公叱馭往所至延見父老問以謠俗民所疾苦教以庸次比耦農桑穀畜兩江左右棄田萬餘頃督亢者召民佃作其中規度其受水多寡為石隄濶其租賦下縣子弟不習於學為築宮令師事孔子移諸博士課授經義或增置弟子員而弟子貧因是嚮學有與計偕者桂林倅某洿行無節法當坐免官上官為關說更三四人獄不能具公至有力者復為書請持必不移而粵宗人祿薄

又後期歲勾貸子錢公為刻日給不足則取藏金奇贏者與之宗人大安

田汝成字叔禾錢塘人嘉靖中以參議分守右江公餘必展書史非但多聞喜道時事輯諸掌故耳目所及欣然攬筆為之注記同官翁憲副萬達善謀能斷汝成與翁計事多所贊助退即敘述所著有炎微紀聞

茅坤字鹿門歸安人進士嘉靖間府江兵備北獐入城殺縣令劫官庫公請於督撫勦之許以便宜從事公部

領七哨約都指揮密搗鬼仔莊頭諸穴大破之陽川始得安生民立祠祀之

陳暹字德輝閩縣人嘉靖間廣西參政曾攝藩事數月司庫官以羨餘例進公令貯帑中為司公費其人相視不肯去公曰爾得無慮盜侵邪隨署數字封識尋擢江西按察使方伯以前金為贖卒不受性喜為詩又明象緯製辟穀丸適大饑聞者詣暹乞丸賴以全活甚衆張冕字莊甫晉江人嘉靖三十五年為桂林同知時宗

藩暴橫殺僕圖賴公力折之有誣戍兵財者上官論如
交夸例公執不可人不能奪陽朔冊籍遭黥胥詭沒糧
無全額屬公覈之糧復其舊全州差役以吏承冒免者
歲不下四五百人坐此役歸貧民公嚴為之裁賦役為
均查梧州倉糧舊額倉儲五萬皆輸自東粵事屬兩省
難稽而奸徒藉此為市公悉廉得之而酌其所侵之久
近以為罪輕重人服其明後謫化州以督臣吳桂芳疏
薦為撫夸僉事公至則按責巡鄉指揮某等十數輩曩

日失守狀將吏咸思自奮桂林城故有敵臺公補以望樓而徙窩鋪以便巡守更築石關以護居人仍擇要害設營堡戍以兵俾哨守相望二衛軍與召募卒按籍覈之選丁壯者編為隊教之技藝而領以武職公亦時自抽閱即風雨不廢後陞右江參議

陳堯字敬甫通州人嘉靖進士累官廣西參政篤意風教時進諸生講藝拓學田以濟其乏廣儲倉多弊孔逮諸飢法者置之法弊清如洗陞貴州按察使復陞廣西

左布政使務崇大體不事煩苛有司間挂一青輒念遐
方平秩良苦寬之使自新檢司帑度支無藝則條為會
計書犁然畫一可案羣胥無敢有闌出扞文罔者靖藩
諸宗率不請名封已食采祿公劑以甲令格不予

張謙字子受慈谿人嘉靖間廣西左參政時督撫應公
方討叛猺至梧州遂以七山羅旁為屬七山賊凡三十
七寨居蒼梧岑藤博白諸縣間窟穴二百餘里山谷險
絕林箐茂密梧人多為賊間公縱軍士樵蘇潛圖其

山川險易及進兵便利處督參將王寵朱昇各以五千人分道入適朝議伐安南佯令兵具安南餉而請督府別發兵防賊逸入羅旁值上元節置酒高會而二將由潯州上流夜倍道入七山賊臥未起聞砲聲散入林谷中我兵搜捕略盡蒼梧士民建祠祀

黎民衷從化人嘉靖甲子任廣西參政其冬古田酋韋銀豹擁衆越城劫藩庫挺身捍賊死之

楊必進字抑之吉水人正德辛未進士嘉靖間廣西按

察副使會聚兵攻古田鳳凰寨三月不下公猝至其地
開獄出囚之壯者二百人許其自效陰部勒之夜分篝火
自間入諸囚斧木仰登出寨後焚其巢諸司夜見寨
火爭踴躍相賀及明見諸囚出詢故始愧謝不及功上
獲厚賞而都御史蕭翀因以府江兵備薦自古田告捷
諸猺轉相傳語畏公如神公以為府江箐密道遠不可
驟以兵入首以恩信結其心諸猺間出數人嘗試公召
之堂下言語嘔嘔比遣歸遺之醪肉或幘巾其後稍稍

率諸猺婦來見公令諸猺婦入見夫人夫人食以糲餌以少針線女紅分給之諸猺婦出其夫咸感激誓死不敢背德於是得其死力以為鄉導岑猛之變畏公且至先納金求解公密囊金公帑而佯諾其使意欲以此鉤猛而忌者疑有所泄遂被論去

伍箕安福人進士嘉靖七年府江兵備副使時猺夸出沒為民患箕詣縣親問疾苦多向化者治臨賀城宏壯堅密又詣富川為濬城壕葺門樓規制稱雄麗云

王顯高綿州人進士嘉靖初慶遠知府剛介嚴明奸宄
斂迹南丹等州猺蠻桀驁痛懲之而復其侵地土目韋
正西盜三寨巡檢司印計擒誅之尤如意士類新學宮
復書院擢本省兵備副使

李如圭澧州人進士嘉靖初任府江兵備副使以名節
風勵邊俗嘗於道中見井闌石有異亟命滌之乃宋道
鄉書院殘碑也書院久廢莫有知遺址者公曰此鄒忠
公之靈實命我矣遣人遍求斷碑得數片貯學宮作詩

紀其事遂興復書院官至刑部尚書

翁萬達字仁夫別號東涯揭陽人嘉靖丙戌進士十三年知梧州府梧雜民夸加以師旅公經畫供億足用省費總兵仇鸞縱卒橫行公縛之繫獄郡稱治平會安南莫登庸篡國南人上變朝議征之上命兵部尚書毛伯溫侍郎張經同咸寧侯仇鸞督兵討之添註公為廣西征南副使贊理兵務密募敢死士梁文韜等數人入安南偵其情龍州憑祥二州土舍趙楷李震韋應以嫡孽

爭立作亂數十年不已登庸曰中國土官比比弑逆無能正法獨慮及我何哉督府聞之謂公曰君其謂何公曰兩州瓜連三凶鼎立難以兵勝惟斷其中堅使不相屬然後可次第圖也公遣指揮錢希賢首擒應次擒寰最後乃召楷杖殺之立其子匡二州悉定斷藤峽猛獍侯公丁以其兄勝海為武靖州目黃貴所刺譟眾為亂公密謀擒公丁磔于市乘勢集兵破賊藤峽悉平又四峒為土人黃賢相所據稱兵脅眾以奸法紀公諭參將

余思駐兵徐圖授以秘策賢相尋獻地以附南寧督府
上其功陞公浙江右參政尋改廣西時方有事安南公
受督府檄屯龍憑思陵等處誓師觀變獲安南姦細丁
南傑削幅延欸畢得其國中情偽乃縱之歸國俾語登
庸蚤自為計登庸大恐遂詣鎮南關納欸遣其姪文明
奉表降上貸之罷安南國為都統使司賜登庸不死以
都統使治其地於是班師論功行賞有差而公之功實
居其最

錢鐸字振之號南浦正德辛巳進士嘉靖間以副使飭
兵府江府江荔浦諸郡三洞寫窋萬山巉巖蠻鹵犷醜
怙阻積毒民病焉君至輸以悃愾諭以利害嚴以偵邏
威以舟兵於是乎悟者歸命悍者竄伏且生得大憝數
十人戮之以徇土人謂三十餘年無此績也

許應元字子春嘉靖中為廣西副使夸侵蝕郡縣久公
患之為上三議曰責田主嚴罰格更旗軍大略主守隘
護田者扼夸奪之食積牙牯童使自屈而已已又攝兵

府江巨獍莫氏兄弟三人以雄勇名兩粵間往數歲嘗大嘯聚破城殺吏及是復出猖甚公設方略陰部勒購土人決旬而三克授首江道底寧間治獄有觸法當遠戍者而人甚衆公第謫其一二人餘悉末減

吳世澤字宗仁連江人嘉靖癸未進士累擢廣西按察副使分飭府江廉潔精剴獨持風裁剔吏蠹端士習復流移通商賈諸蠻賊隸府江者故多桀驁為疆場患公謂非創無以示威非撫無以示信整兵耀武嚴為之備

而以德懷之不數月猺蠻相戒無敢犯部境諸鄰峒復業者十餘家府江為之肅然

吳元璧安仁人進士嘉靖三十八年府江兵備副使雅意人才集諸生為文親改竄而潤色焉時恭城學宮移建未就力修葺之又親帥師平三峒之寇縉紳競為詩歌侈其事

方紀達字行可歙縣人進士嘉靖八年以僉事分巡左江值田寧用兵之後出謀發慮動合機宜如思思之遷

荒田隆安之不屬田州皆有力焉加意撫恤民賴以生
章熙字世曜海陽人嘉靖甲辰進士累官按察僉事分
巡蒼梧梧白馬三州故險道也江路逶迤林木深阻諸
蠻窟伏為患久矣公至首咨民瘼白于督府檄縣邑治
火其大斧長鑊之屬以千數因下令調集諸路營兵而
躬履其地發縱指示度其地勢高下而刊夸之盡伐其
樹楮其山分兵守焉自是諸蠻奔突竄伏不敢復出
趙墳字平仲餘姚人公故清介人不敢干以私號趙鐵

面嘉靖間為廣西僉事分巡桂林不事檢攝其門閭若無人者及聽兩造率以情斷經其庭者無冤民

蔡文南靖人進士嘉靖四十一年府江兵備副使料敵握奇百策百中嘗於樽俎中馘巨酋雍容閑整有老將風暇日集士之秀者講明奧義多邊障功時稱長城

鄭一龍字于田惠安人嘉靖間為按察司撫夸僉事時古田不靖報謀紛拏公搜諸掌故著其沿革作撫夸志自東西四鄉及古田全灌諸哨無不悉心經畫又作撫

夸通論一曰嚴緝事二曰別蠻情三曰禁招主四曰誅
賊脚五曰謹巡哨六曰明賞罰七曰防寇有時八曰勦
賊有引著為功令施行旬是盜賊斂迹後為副使兵備
右江至則申約束與文武更始科派者禁偷安者禁騷
擾者禁賣放者禁通夸者禁而密陳之制府曰遷江之
東歐來賓之北三北五柳城之上油宜山之清潭都亮
賓州之淶里橫行流劫宜草薶禽獮以快人心制府一
以右江事屬公公檄守備輩一聽指揮分以疆域責令

鵬勦賊甫離巢隨卽捕獲羣盜屏息會中丞殷公征古
田公所條畫悉當擢參政告歸

李中字子庸吉水人正德甲戌進士授刑部主事抗疏
忤武宗謫驛丞世宗即位擢廣東僉事轉廣西提學日
與諸生講聖賢之學如家人父子然時迎親就養諸生
持二簋為獻亦如家人禮不為忤也歷右布政使舉行
鄉禮士民頌之官至右副都御史

唐胄字平侯瓊山人弘治壬戌進士授戶部主事值逆

瑾竊柄謝病歸瑾誅起授戶部嘉靖二年陞廣西提學
遍鬻羣書啟廸多士文風丕變及為廣西左布政使時
宗室受封賄官吏補支祿米自出幼具題日為始歲費
幾十萬胄奏乞停寢歷陞戶部左侍郎

黃佐字才伯香山人正德辛巳進士嘉靖間為廣西提
學修書院撤淫祠行射禮舉節孝立鄉社擇土民及猛
獍之子弟教之風化大行以舊通志闕略發凡舉例為
圖經為表為志為列傳為外志總六十卷歷官至宮詹

潘恩字子仁上海人嘉靖間廣西督學僉事檢飭醇謹
在官三載未嘗見有厲色諸生樂嚮之校士之暇間吟
詠以自娛廣右諸山水經恩題者多可采云

李義壯字稚大番禺人嘉靖癸未進士戊戌任廣西提
學崇雅黜浮得士稱盛嘗攝臬事革藩府守衛之飢法
者明慎持憲獄多平反時稱廉明後仕終僉都御史

袁袞字永之吳縣人嘉靖間以僉事督學廣西初視學
首問名宦祠有解先生縉乎衆對曰無有袞愕然遂移


郡祀解行部將至賓緘書與詩發驛騎往詢馬御史錄
時錄謫戍賓十餘年矣及過所寓館勞苦良久載酒飲
之戀戀不忍別去明日疏乞釋錄疏草已具錄聞之詣
庭固止因不果上兩廣故事藩憲謁軍府庭跪之袞獨
長揖軍府雅聞袞風節歡延以入亡何移病歸袞厲諸
生尚名檢謂名檢一壞即卿雲之文金張之貴無為也
諸生中頑鈍無恥者杖之見者莫不震懼

謝少南字應午上元人嘉靖間以僉事督廣西學政少

南經學多妙悟語諸生曰觀書須將自心求取立言者之旨無泥成說妨吾自得見諸生文互尚祖襲每詆訶以不學令取諸經傳讀之母寄人籬下聞者聳然行部試諸生奇柳張翀後有氣節名人稱其藻鑒云

王宗沐字新甫臨海人嘉靖間為廣西督學視事三日召諸生升堂與語冲容緩節人皆聳聽已而行部徧試歸檄取茂才會宣成書院公時加提倣不徒課誦讀較文藝且令反求本心士多恍然悟者尋擢去其試蒼梧

為故吳司空廷舉擇族子二人並廩學舍使守宗祀又
謂蔣相國冕有定策功為刻湘臯集以傳後以左布政
使至復召集諸生如前論學云



粵西文載卷六十五